

Appel Pro Quotidiana – grazia fitg!

■ **Dapi la fin da fanadur 2017 han passa 1700 persunas sustegnì l'appel „proquotidiana“ cun inditgar en l'internet lur num e lur domicil.** Entaifer in mais, e lura anc durant il temp da vacanzas, tantas signatarias e tants signataris - quai è ina ferma manifestaziun da solidaritad e simpatia per la suletta gassetta rumantscha dal di che resguarda en sia part redacziunala Rumantschas e Rumantschs da l'entira Rumantschia e sur ses cunfins ora.

La gruppa dals iniziants da l'appel vesa sia lavur principala sco fatga ed exprima in grond GRAZIA FITG a tut las persunas ch'han dà lur num per quest appel e ch'han intimà era auters da far quai. Questa acziun n'è segirament betg stada senza effect sin ils responsabels. E forsa che ina ni l'autra persuna che n'aveva enfin ussa betg anc La Quotidiana è vegnida conscienta da l'impuritanza dad ina gassetta per l'entira Rumantschia e daventa ussa schizunt abunenta. La pagina d'internet www.proquotidiana.ch resta activa vivanant per tut las persunas che vulan anc signar l'appel.

La Quotidiana, edida da la Samedia a Cuira, era en privel da svanir complet-

tamain sin la fin dal 2017. Ussa han la Lia Rumantscha, il Chantun Grischun e la Confederaziun ensemen cun la Samedia chattà ina soluziun transitorica enfin la fin dal 2018, quai ch'è zun impurtant. Ma la lavur per propri cumenza pir. Ils iniziants speran, sin fundament da l'appel cun las numerusas sutscrizziuns, che las persunas ed organisaziuns responsablas cuntinueschian cun schlantsch lur lavur e mantegnan in spiert aviert cura ch'i va per chattar ina nova via a lunga vista per ina gassetta quotidiana rumantscha. In pass enavos tar il regionalissem periclitass la convivenza ed engrevgiass la communicaziun ed il svilup dad ina ferma Rumantschia. Sch'ina pitschna minoritad linguistica vul viver vinavant e vegnir respectada, resguardada e sustegnida cunzunt era d'ordaifer lura n'astga betg mintga pitschna vallada guardar mo per sasezza.

Ilis iniziants da l'appel proquotidiana:

Hans Caprez, Castrisch;

Bernard Cathomas, Cuira;

Giusep Nay, Valbella;

Maria Cadruvi, Ruschein;

Gion-Andri Cantieni, Turitg